

INUIT ATAQATIGIIT

Inatsisartuni



3. juni 2020

Inatsisartut Suleriaasianni § 37 imm. 1 naapertorlugu Naalakkersuisunut apequt imaattut matumuuna saqqummiuppagut.

Naalakkersuisunut apequt:

- 1. Nuup eqqaani nipisanniartumut Naalakkersuisut Siulittaasuata angallani atukkiussimagaa ilumoorpa?**
- 2. Atukkiussisoqarsimappat tamatuma Naalakkersuisut Siulittaasuata ilaqutaanut aningaasatigut isertitaqaataasimanera ilumoorpa?**
- 3. Nuup Maniitsullu eqqaani aqutsiveqarfinni nipisaat pisassat 12. Maj 2020 amerlineqarnerannut atatillugu Naalakkersuisut Siulittaasuata angallataalik attartortoq pisassinneqartunut ilaava?**
- 4. Naalakkersuisut Siulittaasuata uppersarsinnaavaa nipisaat pisassat qaffanneqarneranni aalisartitseqatigiiffiit sorliit pisassanik tunineqarnissaannut aalajangeeqataasimanani?**
- 5. Naalakkersuisut Siulittaasuata uppersarsinnaavaa 2020-mi pisassat nipisaat aalisarneqarnerannut akuusimanani, toqqaannartumik aalisaqataanermigut imaluunniit angallatiminik attartortitsinikkut?**

(Inuit Ataqatigiit Inatsisartuni)

Tunggavilersuut:

Tallimangorneq 29. Maj 2020 partiit gangianniinnermini Inatsisartunut ilaasortat arlallit tusaasaannik Naalakkersuisut Siulittaasuata oqaatigivaa Nuup eqqaani nipisannik aalisarnermut tunggatillugu isertitat namminerminut tunneq ajortut, nulihamili kontoanut ikineqartartartut. Oqaaseqarnermini aamma isertungilaa nammineq pigisami angallatip nipisanniarnermut atornerqarnera.

Taamaasilluni Naalakkersuisut Siulittaasuata nammineq qulartitsilerpoq, atuuffimmini inissisimanani atorlugu pisassiinermut tunggatillugu, nammineq angallammi attartortinnissaanut nammineq neqeroorsimanerluni aammalu namminerminut ilaqtutaminulluunniit isertititsissutaasussamik taamaasilluni aqutissiuussisimanerluni. Taamaattoqarsimappat tamanna Naalakkersuisut Siulittaasuata akisussaaffeqarluni atuuffimmut naapertuutinngilaa, taamaammat Inuit Ataqatigiit naatsorsuutigivaat qulaani apequtigineqartut Naalakkersuisut Siulittaasuannit unneqqarilluni akineqassasut.

Taassuma saniatigut Naalakkersuisut Siulittaasuata §37 naapertorlugu apeqqutinut nr. 243/2019-imut akissutaani erserpoq aalisarnermik ingerlatsinikkut Naalakkersuisut Siulittaasuut isertitaqanngitsoq, tassami inuussutissarsiutigalugu aalisarnermut atatillugu taanna akuersissuteqanngimmat.

Kissaatigivarput apeqqutitta ullut suliffiusut qulit qaangiutinnginneranni akineqarnissaat.